

豫章叢書

第四冊

明  
道  
二  
種  
像


清道人



卯冬月集

于幸昌溪廬





潯陽記事

宜春·袁繼成 季通

某不佞志廣才疎委質二十餘年罹患難者數矣  
所未涉者國變耳今迺復遭此文謝家三先生外  
無可自處者獨以此心靖獻九廟曷敢自爲名事  
關君臣綱常之大人品學術邪正之分紀述失其  
典司傳聞易於譌謬不昭揭本末正告來許亂賊  
何繇知懼忠貞何以自白於天下萬世晉事先有  
紀襄事詳具宗民公疏中姑敘述梗概爲潯陽記  
事

崇禎辛巳年二月總兵左良玉違督師楊公嗣昌令  
獻賊襲陷襄郡余分信堵鄖竹西界賊入自當歸東  
路罪不在余督師塘報瞭如也部科畏帥悍不敢問  
又納賂欲庇東路疎守者曲文致余被逮繫楚鄖襄  
宗民萬人伏闕號余枉先帝亦知余無罪同事以失  
陷逮無貫者薄余譴荷戈夜郎壬午冬余抵戍裁月  
餘卽有廷臣薦以總理河北屯政召余念封大人太  
夫人春秋暮堅臥不肯出無何京師有邊警鄉先達  
總憲李公邦華貽書相約爲勤王行余遂投袂起扁  
舟遲總憲南浦總憲以召募未卽集稍後期左師則

以襄郢摧敗避關銳竄路池皖間上下數百里江帆  
中斷或勸余改轍浙者余曰某不東左亂未有底也  
徑趨小孤屬潯將某差人齎書左帥責以大義左帥  
意悔悟江路稍通余念此兵不措餉雖暫輯剽掠終  
未可止度總憲李公旦幕至留書具言其故李公言  
諸潯道府移川黔餉十四萬餉之兵自是不復出掠  
矣然猶翱翔江上先帝遣中使宣諭不肯動也三月  
京師邊嚴解以南寇急特遣內閣吳公牲出視師吳  
公議創設潯督控吳楚咽喉司銓以余名上報可余  
行及瓜步聞報疾返金陵與南司馬熊公明遇商方

略總憲李公亦至則云獻賊已于五月初渡江圍楚  
省矣金陵人情震搖余曰事亟矣坐待勅印溷危金  
陵江省俱危迺從門人吳允復貸四千金招致官丁  
數十名冒險指皖要左師西援有傳楚省已陷者俄  
而浮屍蔽江下余指告曰大將軍忍見此乎左面發  
赤仍未有行意余正責之曰大將軍功雖多罪亦不  
少朝廷不督過一歲中兩次中使宣諭開國徐中山  
所未有奈何不圖報稱皖道張亮者頗代左支吾余  
遂厲聲曰公所言非忠人孰無死張睢陽死賀蘭進  
明亦死某行矣寧爲睢陽死不爲賀蘭生中有陳可

立者明大義自率三百人隨余往左亦不安追二十里具揭請發方國安馬士秀等五千人先啟行自督大兵踵至是時賊距潯百五十里百姓思烏獸竄余至人心稍定余檄潯司理嚴繩光聯絡柯陳諸大族扼瑞興衝使賊不得下盡捐四千金犒士秀等兵授計進勦屢敗賊收復蘄春浠昌諸郡縣獻遂棄楚省趨岳沙左帥大兵隨至潯余爲措給本折安插家口關廂候勅印至卽偕左帥視賊向追勦無何吳公中議罷吳公先以疏請馬科兵不肯發遂請陞辭讒者票擬故留之先帝疑以爲逗遛也吳公旣得罪余亦

改任還屯田余念屯田雖善政古今時異宜奈何以  
必不效者嘗試曠官具疏辭且力陳不可屯狀先帝  
不可召對意震怒傳諭馬上差官督催余不已趣受  
事未及月新督呂公大器與左帥不相能軍中大闕  
楚按監以狀聞潯父老亦伏闕請余仍督潯下廷議  
復傳諭馬上督催視潯事左帥則已奉有世鎮武昌  
每事與督臣計議行之旨余曰如此是益長驕何節  
制之能爲也疏以其情密聞得旨仍聽余調度道過  
金陵與南司馬史公可法語其事史公自云出已議  
余曰公賢者此議畢竟錯史公默然南中諸公紛言

督鎮相構景甚危呂公至筇輿趨江省避其鋒左帥  
聞余至稍安迺挈全營還楚蓋甲申二月間事時衡  
允袁吉雖收復大賊營尾尙蔓延日荆間江楚甌脫  
有所謂天井窩者勢險峻獻留餘黨數千人嘯聚其  
中爲後應呂公遣李懋功等將六千人討之反爲所  
敗諸將飾以捷聞呂公以得代不及察捷甫上上高  
萬載告陷余按兵籍馬科等兵已調還柯陳等兵以  
不律遣去呂公所帶馬匹十隨去六七惟郭雲鳳三  
千人成一旅又皆新募烏合余不得已檄雲鳳行雲  
鳳故張賊勢余知其膽怯適鄧林奇率所帶家丁三

百人來見余遴選得二百人復以郝效忠部三百人  
佐之雲鳳迺行余先已密遣人喝賊虛聲且許令自  
新賊遂詣軍前降余止誅首亂反復盧南陽輩數人  
餘俱散遣歸農雲鳳之兵固弱而驕部將甘啟明等  
指良爲賊肆暴邨落間余廉得其實論如法雲鳳方  
有內援怏怏也聞將鄭鴻達新募到水師頗循紀然  
無一船余手口拮据造烏船三千號船可容百人改  
造民船百餘號鑄給紅衣大砲百餘位將率之入楚  
協同左帥等收復襄郢無何有聞陷畿南之報史大  
司馬咨會爲入衛計遂不果行差副中軍李瑋持皇

命往督戰左帥時已進寧南爵驕蹇不受制四月北  
報益急掌科左公懋第以視楚師道尋相對慷慨雪  
涕掌科願以身任楚事余率鴻達等北援抵皖上南  
京差官以齎到今上監國睿書知先帝有三月十九  
日之慘變痛哉痛哉臣子何以生爲哉心念寧南左  
右無正人聞變必生異議急貽書寧南備道今上倫  
序之順兼請陛見陳上流情形嗣聞定策時留都先  
有異議舊督呂公任少司馬持之尤堅史公貽鳳督  
馬士英書亦有五不可之說馬倚逃將高傑等兵劫  
史公史公不得已從之馬遂據爲功自來都覲賀不

肯往鳳陽密繕進史公五不可書搖上心已得入內閣總樞部矣有附魏璫阮大鍼者罪錮久家居素挾梨園出入馬幕中馬首欲引用內閣姜公曰廣持不可馬大恨馬又挾史公晉高傑等伯爵余陞見面奏封爵以勸有功無功而伯則有功者不勸跋扈而伯則跋扈者愈多上領余言歛歛久之曰事已成矣忻城伯趙之龍奏曰臣等亦知成事不說但關繫甚重臣祖一門死事十八口裁得伯爵以後封典還望皇上慎重之龍又奏曰臣昨過揚州親見高傑與黃得功兩家格鬪若不急安輯揚州立見焦爛高傑原是

士英引他過河就該令士英出去收拾余在旁從史  
趙上曰朕亦說該馬先生去他不肯去沒奈何史先  
生願去聽他去罷余奏曰皇上卽位之初雖以恩澤  
收人心尤當以紀綱肅衆志大抵君德以英明爲用  
伏祈皇上獨奮靈斷申明法紀冬春間淮上未必無  
變臣等雖驚願奉六龍爲澶淵之行以作諸軍之氣  
上聞頗有難色姜公曰廣出班奏曰袁某所言澶淵  
之行非遽爲此事却不可不時提此志上又額之余  
請榻前密奏曰左良玉雖無異圖所部多降將非孝  
子順孫全要處置得宜月餉尤須湊給上曰頃良玉

奏父他餉一百二十萬該給他可到閣中議安行余  
又密奏曰皇上初登大寶人心未免危疑臣昨馳書  
良玉意外亦不可不防臣明日不敢面辭星馳回潯  
料理上允可余叩頭出往閣議事馬聞余廷對語意  
不平余又責史公不當伯高傑馬益不平余不顧且  
疏勸上用入圖治薦用劉公宗周黃公道周吳公姓  
楊公廷麟葉公廷秀等復引宋高宗用汪黃事爲戒  
馬知余爲已發恨刺骨矣史公姜公議留余筦樞余  
曰如此是以官來也登極例加恩晉一級俱辭不受  
以八日夜還潯左師恢郢者聞北變果自潰寧南接